

«Interes politikoak sindikalen gaineratik jartzea arriskutsua izan da beti langileontzat»

UGT eta CCOO Hego Euskal Herriko hiriburu guztietara bildu zituzten euren jarraitzaileak

UGT eta CCOO sindikatuek Hego Euskal Herriko hiriburu guztietan egin zituzten manifestazioak. Aldarrikapen nagusia 35 orduko lan-astea izan zuten arren, ez ziren falta izan ELA eta LABen gainera kritikak, horiek «interes politikoak sindikalen gaineratik jarri nahi dituztelako».

K. Martin / Bilbo
A. Unanue / Iruñea

UGT eta CCOO manifestazio bateratua egin zuten atzo Bilbon. Sindikatu horietako buruzagiez gain —Carlos Trevilla eta Santiago Bengoa—, Javier Madrazo IU-EBko idazkaria eta Nicolas Redondo Terreros PSE-EEkoa izan ziren bertan. Enplegu gehiago, egonkorra eta eskubideekin. 35 lanorduen alde leloko pankartaren atzean, milaka lagun bildu ziren Bizkaiko hiriburuan. 35 lanorduen aldarrikapena nagusia izanik ere, enpleguaren sorrera eta egonkortasuna bultzatzeko aparteko lanorduen desagerpena eta aberastasunaren banaketa ere eskatu zuten CCOO eta UGT sindikatuek.

Nicolas Redondo Terrerosen PSE-EEK manifestazioan parte hartzeko arrazoiak azaldu zituen: «Lehenik, CCOO eta UGT sindikatuei sustengu osoa adierazi nahi diegulako, eta bigarrenik, hurrengo legegintzaldia bakearena eta enpleguarena izatea espero dugulako». Halaber, Redondok esan zuen langileen interesak defendatzeko gunea Espainia zela, eta inola ere ez Euskal Autonomi Erkidegoa. «Negoziatzeko gunea Espainiako Gobernua da, eta ez Eusko Jaurlaritza». Bestalde, ELA eta LABek beren aldetik manifestazioa egin izana kritikatu zuen, «oso arazo larria baita sindikatu nazionalistek sindikagintzaren beraren gainera politikari lehentasuna ematea».

Horren ildotik, Santiago Bengoak, CCOOko EAEko idazkariak, deia egin zien ELA eta LAB sindikatuei eraikuntza nazionalaren inguruko interesen gaineratik langileen interesei erreparatzeko, horrela, Gobernuaren eta patronalaren aurrean indartsuago agertuko liratekeelako. «Interes sindikalek politikoak gainditu behar dituzte; bestela, historikoki, sindikatuak alderdi politikoaren papera betetzen saiatu direnean, ondorioak kaltegarriak izan ohi dira langileentzat», gogoratu zuen Bengoak. Horrez gain, Bengoak langileen kontrako PPren politika kontserbadorea kritikatu zuen, baita EAJk politi-



CCOO eta UGTk deituta Donostian egin zen manifestazioa joandako familia bat. ANTONIO ALONSO / EFE

ka horrek iraunarazteko Espainiako Gobernuari ematen dion laguntza ere. CCOOko buruzagia, bestalde, prest agertu zen sindikatu nazionalistekin batera greba orokorra egiteko, «beharrezkoa izango balitz».

Carlos Trevillak, UGTko EAEko idazkariak, besteekin bat egin zuen sindikatuen arteko banake-

ta gaitzestean. «Giza eredu berdina defendatzen ditugu sindikatu guztiek, baina eraikuntza nazionalari buruzko ikuspegia ezberdina dugu ELA-LABek eta guk. Arrazoi horregatik sindikagintza banatzeak langileen borroka ahultzea baino ez dakar», azpimarratu zuen Trevillak. Halaber, UGT Eusko Jaurlaritzak

EAEko enpresei ezartzen dien fiskalitate mesedegarriaren kontra agertu zen, «politika horrekin enpresarien alde jokatzeko duela», eta, beraz, langileen kontra», salatu zuen Trevillak.

Bilbon bezala, Donostian ere 35 orduko lan-astea aldarrikatu zuten UGT eta CCOO sindikatuek. Deialdiak ehundaka jarrai-

tzaile bildu zituen Bulebarrean, langileen nazioarteko egunean.

Nafarroan sindikatuak zein bere aldetik • Bi sindikatuen arteko harremanak ezin hobeak badira ere, Nafarroan UGTk eta CCOOk ez zuten ekitaldi bateraturik egin.

Maiatzaren Leheneko manifestazioak gero eta jende gutxiago elkartzen zuela ikusirik, UGTk haren ordez ekitaldi labur bat eta bazkaria egitea erabaki zuen duela urte batzuk, eta atzo ere hala egin zuen. UGTko jarraitzaileak Zangozan bildu ziren, eta Juan Antonio Cabrerok, sindikatuko idazkari nagusi berriak, 35 orduko lanaldia aldarrikatu zuen Udaletxeko plazatik.

CCOOk, berriz, urteroko manifestazioa egin zuen Iruñean, 35 ordu: enpleguaren eta elkartasunaren alde leloarekin. Manifestari animosoenak alderdi komunistakoak izan ziren, dudarik gabe: eztarria lehertu arte jardun zuten PPren politikaren aurka eta enpleguaren alde oihuka. Mila lagun inguru bildu ziren, aurreko urteetan baino gutxiago, eta Gobernu Ordezkaritzaren aurrean bukatu zuten, Francisco Javier Ansuategi Gobernu ordezkaria leihotik begira zutela. Sindikatuko idazkari nagusi Jesus Garateak indarrak batzeko premia agertu zuen, baina ELAren eta LABen irainak ez dituztela onartuko nabarmendu zuen: «Francoren diktadurak ez zuen lortu gu isiltzea, eta hark lortu ez zuena ez dute orain hauek lortuko. Guregana badatoz, ongi etorria egingo diegu, baina ez ditugu irainak agoantatuko». X

ANTONIO ALONSO / EFE



CNTko jarraitzaile bat atxilotu zuen Ertzaintzak Donostiako manifestaldian

CNT sindikatuak ere Hego Euskal Herriko hiriburu guztietan egin zituen atzo manifestazioak. 35 orduko lan-astea aldarrikatu beharrean, 30 ordukoa eskatu zuen. Bilbon eta Iruñean beste sindikatu batzuekin batera egin zituen manifestazioak, baina Donostian CNTkoek euren aldetik egin zuten Maiatzaren Leheneko ospakizuna. Ertzainek gertutik jarraitu zuten manifestazioa, eta haren amaieran CNT sindikatuko jarraitzaile bat atxilotu zuten Gipuzkoa plaza inguruan. Espainian, bestalde, sindikatu anarkistak Gerra Zibilean eta diktadura garaian hildako langile guztiak omendu zituen.